

نومه سووم یوحنا

۱

۱ طرف یوحنا، رَبَر روحانی کلیسا
به غایوس عزیز که اووه حَقَّتَن دوس دارم. ۲ برار عزیزم، آ خدا مَحْم که م
کَل کارات موفق بووی و بدنت آم لِفِ روحت م سلومتی و تندرستی بووه.
۳ وختی برارون مسیحیمون اینجون اومِن، مونَ جَلی شاد کوردن، سی یانکه به
مو خبر دان که به حقایق الوهی وفادار و مطابق هُنون رفتار بگنی. ۴ سی مو
هیچ دلخووشی گفتر آ یان نی که شَنفَم بچوئم ایطو آ حَقَّت پروی بگنن.
۵ برار عزیز، تو م کَل کارات سی برارونت، آمونت دوریت نشون بدهی،
بخصوص یانکه پیش تو غریبن. ۶ هُنون م کلیسا آمون وَر رفتار پُر مُحَبَّت تو
شوهادت دانه؛ پ کار خوبه بگنی آر هُنون اوطو که سزاوار خداس، رونه
سفر گنی. ۷ سی یانکه هُنون سی دل او نوم سفر کوردنه و آ غِر یهودیون
کمکه نَ اَسوندنه. ۸ پَ وا آمون ایطو گسونیه حمایت کُنم تا پی هُنون م پش
بوردن حَقَّت همکوری کورده بووم.

۹ نومه به کلیسا نوشتم، اما «دیوتریس» که جایگا اول دوس داره، تن به
اقتدار آمون نَم دهه. ۱۰ پَ وختی اَم، به کارایه که بگنه رسیدگی بگنم، سی
یانکه پی غرض درباره آمون بد بگووه و به یان آم بسنده نکورده، برارون
آمون قبول نَم گنه و گسونیه آم که مَخن هُنون قبول کُنن، منع کورده، آ کلیسا
دَر ببهه.

۱۱ ای عزیز، بدی سرمشق خودت مکن، بلکه آ خوبی سرمشق گر؛ سی
یانکه نیکوکردار آ خداس، اما بدکردار خدان ندیده. ۱۲ کَل درباره دیمیتریوس
خوب شوهادت بدهن، حتی خود حق. آمون آم ایطو شوهادت بدهم و دونی که
شوهادت آمون راسه.

۱۳ خلی چیا داشتُم که سی تو نویسُم، اما نَحُم پی مرکب و قلم بووه. ۱۴ اما
ایدوارُم زیتره تونَ بیئُم و ری به ری قصَه کُنِم.
۱۵ سلومَتی پی تو با!
دوسون گُشون وَت سلام برسونن. سلام مونَ به گُل دوسون رسون.

